

Atasi kesempitan hidup

Peneroka mahu perlombongan bauksit disegerakan

Oleh MOHAMAD SHOFI MAT ISA

pengarang@utusan.com.my

■ Kuantan 25 Feb.

KESEMPITAN hidup mendorong peneroka di FELDA Bukit Goh di sini terutama yang terlibat dengan perjanjian perlombongan bauksit bertindak mahu menjual tanah ladang mereka untuk menyara kehidupan keluarga.

Ahli Dewan Undangan Negeri (ADUN) Sungai Lembing, Datuk Md. Sohaimi Mohamed Shah berkata, ada antara peneroka yang memperoleh pendapatan RM50 sebulan ekoran kejatuhan harga kelapa sawit dan bergantung hidup menerusi sumbangan serta bantuan anak-anak.

Sehubungan itu, katanya, apabila Kerajaan Pusat mengumumkan tempoh moratorium perlombongan bauksit yang akan berakhir 31 Mac ini tidak dilanjutkan, peneroka di FELDA Bukit Goh dan FELDA Bukit Kuantan di sini berharap kerajaan dapat mempercepatkan kerja-kerja perlombongan bahan mineral itu.

"Apa yang saya sampaikan ini adalah hasrat peneroka di FELDA Bukit Goh dan Bukit Kuantan yang mahu kerajaan mempercepatkan kegiatan perlombongan bauksit tetapi perlu mengikut prosedur ope-

rasi standard (SOP) yang ketat supaya masalah antaranya debu merah yang berlaku sebelum ini tidak berulang," katanya dalam sidang akhbar di Pejabat ADUN Sungai Lembing di sini hari ini.

Yang turut hadir, Pengerusi Jawatankuasa Kemajuan dan Keselamatan Kampung (JKKK)

FELDA Bukit Goh, Jefri Salleh.

Sebelum ini, Menteri Air, Tanah dan Sumber Asli, Dr. Xavier Jayakumar berkata, tempoh moratorium terhadap kegiatan perlombongan dan pengeksporan bauksit dari negeri ini yang berakhir pada 31 Mac ini

tidak dilanjutkan.

Md. Sohaimi berkata, selain menyampaikan hasrat peneroka, beliau ingin memaklumkan bahawa kajian YP Mineral, anak syarikat milik Yayasan Pahang mendapati bahawa terdapat kira-kira 18.5 juta metrik tan bauksit yang boleh dikeluarkan dari negeri ini meliputi Lembah Jabor, FELDA Bukit Goh, FELDA Bukit Kuantan dan Sungai Pinang di sini jika perlombongan bahan mineral itu diteruskan.

"Nilainya adalah dianggarkan berjumlah RM2.59 bilion dan jika dikira kerajaan negeri akan memperoleh royalti RM259 juta iaitu kira-kira RM300 juta dan dalam keadaan ekonomi ketika ini jumlah ini begitu diperlukan," katanya.



MD. SOHAIMI MOHAMED SHAH